

Yeun ar Gow: E skeud tour bras Sant Jermen - Eñvorennoù bugaleaj (1978)

[...]

Dre ma tostae gouel Nedeleg e veze laouen ar vugale o soñjal er pezh o divije digant ar Mabig Jezuz. Nag a huñvreoù kaer am eus-me bet graet neuze, bihanik-tre! Bemnoz, a-barzh mont d'am gwele, e peden ar Bugel-Doue da zegas din un daboulin, ur c'hleron pe ur c'hoariell all bennak, rak ne oa anv ebet neuze c'hoazh eus an Tad Nedeleg, evel bremañ. Hogen, pa vezen disuj, e tegase ma maeronez din da soñj e rankjen bezañ furoc'h pe ne gavjen netra em botoù antronoz ar Pellgent; ne blij ket ar re vihan disent d'ar Mabig Jezuz.

Dalc'hmat e c'houlennen penaos e c'helle hemañ diskenn e-barzh an ti dre doull ar siminal, hep en em saotrañ gant an huzil. Ha derc'hent ar gouel, goude koan, ne ankouaen morse kempenn ma botoù da lakaat war an oaled klouar, dirak an tan. Antronoz vintin, avat, ne baden ket gant ar blijadur o kavout, e korn ar c'hougn, an teñzorioù am beze bet eus ar Baradoz: gwestell, chokolad, Maboùigoù Jezuz sukr roz gourvezet e kavilli paper arc'hantet, ur marc'hig kartoñs war beder rodig koad, pe un drompilh alaouret gant pichourelloù gloan en istribilh outi.

Siwazh! un deiz, pa gavas d'am maeronez e oa deuet ma skiant din, ec'h anzavas ouzhin n'eo ket ar Mabig Jezuz a lakae an traoù kaer ha mat-se e boteier ar vugale. O c'herent eo a rae kement-se evit ma vijent laouen da geñver deiz ginivelezh Hor Salver e kraou Bethleem. Ur galonad e voe din ur seurt keloù hag, e-pad pell, e chomis mantret gant an dristidigezh. Pa glevis na oa nemet ur sorc'henn ar gredenn gaer-se e vagen e goulid ma c'halon, e seblantas din e oa torret un dra bennak em c'hreiz. E gwirionez, brevet e oa ennon an neudenn aour am stage ouzh huñvreoù dispar ma yaouankiz tenerañ. Ma c'herseenn gentañ a voe hounnezh, don ha c'hwerv, war dreuzoù dor ma buhez o tigorin...

[...]